

潞安府志卷三十三

藝文續編五

明

記

黎城縣修城記

蕭 繹 教諭

隆慶丁卯秋九月北魯犯晉破石迫汾甚急尋亦寧謐
越明年戊辰春當道者遵欽命檄郡邑繕城壘濬濠塹
修武備以戒不虞黎城潞疲邑也舊有城及隍卑淺不
足爲守兼之民貧帑空措理無具自他人處之不因循
苟簡則亦束手無策而已邑侯張公晝夜焦勞思圖良

策乃肆筵公庭卑禮善辭以懇邑之大夫人士且先捐俸以爲之倡於是邑之大夫人士莫不慕義爭先雲集川至如子之趨父工也公始量僉夫匠於民間計處餼廩于公家分委景丞陽焦簿繼張尉東銘諏日而從事焉三君者又能時作息均勞逸從役之人莫不懽忻鼓舞三月之間創建重門三座角樓四座敵樓二十座添築墩臺二十四所修雉堞千五百有奇濬池隍深廣各一丈五尺繚垣牆幾至千堵由是向之卑者高不可攀淺者深不可臨確乎一金湯也夫當大事者必有善處之才而又有急先務之智然後事可得而濟今茲民窮

財盡事之難處者莫踰於興作莫急於防禦也公於斯
時不勞民不傷財不煩誓戒不假刑威而宴然建此保
障之奇功又且先完倉廩以儲糧餉修教場以練兵戎
立鐵冶以備器械而森然預茲守備之至計非有善處
之才及急先務之智者能如是乎矧黎壤地不滿百里
一彈丸黑子耳而地利人和堅甲勝兵凜乎有虎豹在
山之勢卒然有警無足爲慮矣余敢次其事之顛末及
著公之才智俾後之享安平之福際難處之會者知所
自而感有所企而及也張公山東單父世家名遵約字
復之貞庵其別號云隆慶戊辰十月旣望日立石

李侯修城記

姚九功

邑人

襄垣之沿革廢興徙置不一前人記之詳矣李侯來宰是邑不期年而政成化行常目擊傾圯欲更新之第恐勞民傷財不忍起大功動大衆隆慶元年九月魯賊大舉入寇破石州屠掠甚慘公深爲百姓憂越明春卽大戒於衆增築城顛各五尺許濬塹二尋有餘又以堞臺頻修頻壞耗財力乃悉砌以磚計堞一千五百有奇翊門敵臺八座四樓亦量薦而崇之事舉而民卽樂從工興而效卽底績蓋由公之畫茲舉也酌虛實以賦磚工不盡民之財視等則以程力役不盡民之力故樂爲之

趨易曰悅以使民民忘其勞傳曰擇可勞而勞之又誰
怨此之謂也時戶積耗半縮故額公白諸常道汰逋絕
覈實丁裒多益寡劑量而歸併之此非尹鐸損戶數以
保障晉陽之遺意乎其他革吏弊詰奸慝抑豪橫禁賭
博捐資以修學宮節財以省冗費善政不一而足而冰
蘖清操一毫不染宜其由心達政而衆美之咸集也邑
士民索予識其事遂不揣而爲之記公名貴和字子中
河南祥符人嘉靖乙丑進士贊定者判簿陳力教諭賈
緣司訓宋時儒士曹相督役鄉民王斌等法皆得書

襄垣縣鄉約所記

呂坤

萬歷甲戌余筮宰襄垣秋八月抵舍視事明年乙亥冬
今中丞鄭公撫三雲謂雲中繁億且與黠魯界一垣難
於試令疏三晉久任者調焉冢宰以余請上從之乃移
余大同襄之士民不以余不肖當速去也胥慄慄動離
思旣强余圖之像矣行日大雪繽紛泥塗載道父老數
百人又强易余舄相與震哭於堂署鄉先生觴余遠郊
庠諸君濡衣淖履拜余於原野遠落僻寨之民又相續
執名牒而伏哭於道左者凡六十一聚幾千人有戴香
而涕者有曾爲余大創而號泣從車不能去者有小兒
拜跪於車前者有再越宿而至南關驛者僚儕祖餞伶

優亦流淚奏樂哽咽不能仰視明年丙子爲余祠又明年爲余碑嗟嗟民情之厚亦至此哉以余涼德之人叨食茲土歲餘矣諸所供需孰非百姓膏血而毫髮無補焉方用爲媿乃百姓依依有餘情風俗綦摯忘令之大惡而小惠是思也余何敢承抑將曰某何功德於我邑民而惟不甚虐也我邑民猶不忘用以風來者云爾余何敢承昔余之在邑也蒙昧無達識一令下一政行於民情舉無當也民乃大拂惟時所師事者雙峯姚公西坪賈公實指命之諸縉紳長者及士及父老實箴戒之俾不迷於嚮往以速大戾何德與功而百姓之念余若

斯也往謂襄俗僂悍至載諸職官誣甚矣誣甚矣夫舊
令之不忘厚也薄施而侈享焉恥也二三子無重余恥
設謂余未可棄也時一在口頰間榮矣安用祠倘藉二
三子福靈不以大同之罪殛也異日復得道銅鞮相與
周旋余豈忍忘二三子哉舊遊之地將睠睠凝睇焉三
晉云何恐以謂報祠也是掩余愛二三子之心也余欲
毀祠辟碑乎恐拂二三子又懼弗從其改爲鄉約所夫
邑之有鄉約以崇聖訓也士民暇則與聚焉談禮讓敦
情好以保其田廬而俗益長厚蓋有邑則有之矣向余
念弗及此是闕然有遺罪焉請以余祠名之二三子其

余從則是舉也非直免恥亦以遠余罪也是二三子之益愛余也是歲戊寅正月上元日

魏孝文帝廟記

姚九功

襄垣境內故有魏孝文帝廟二一在縣西獅山北麓一在縣北五陰山顛五陰山廟祀歲時不乏攷帝少時生母李貴人依故事賜死馮太后見其英敏恐不利已盛寒閉之絕食三日欲廢之而立咸陽王禧用東陽王不僕射穆太尙書李冲固諫乃止又宦者嘗譖帝於太后太后杖之數十默然受之後竟無憾意父顯祖宏嘗患癰帝親咀吮太后崩勺飲不入口者五日哀毀過禮竟

行三年之喪正律例定冠裳制禮樂較權衡立明堂辟
雍親賢任能從善如流故太和三十年間雖嘗用兵江
南江北民安物阜雨順風調粗有熙皞遺風庶幾乎綱
常仁義禮樂之主也先正有詩云較量民俗更胡俗彷彿
遺風類漢風諡曰孝文非過情也帝自代遷都洛陽
往來駐蹕此山故後人思之廟祀不絕但棟宇歲久傾
圯里人姚洪嘆曰帝前代賢主也吾輩村落雨暘祈禱
恒於斯里中會社恒於斯可目擊頽毀令無裨後觀乎
乃獨發虔誠鳩工飭材撤腐作新不三閱月而厥工告
成峻宇崇簷華棖彩桷丹雘輝煌燦然可觀仰瞻帝像

冕旒袞章神彩赫奕臣僚班敘儼若朝儀謁容展拜自不敢慢且易也因計大工顛末鐫之貞珉用示後人云

文昌祠記

姚九功

襄邑學宮東南隅故有文昌祠祀梓潼帝君嘉靖八禩改爲啟聖祠固一時權宜之計也夫神炁貫於天則爲列宿精英神遊於地則爲昌文靈秘凡祿秩桂籍皆所綱維故天下郡邑學宮咸立祠祀神良以是也惜迹涉輪迴子所不語不得分半席於孔子廟庭而類從丁祀血食無窮亦天理之在人心不容泯者我襄缺是祠越五十餘年邇邑侯洛西成吾田公以名進士歷御史秉

臬爲當塗排擠復擢觀篆甫一載凡廢政之巨者罔不
作新復念茲隆典卜學前曠地一區鳩工飭材建正殿
三楹東西兩序六楹戟門稱之不踰期而厥工告成峻
宇重簷華棖彩桷金碧烜炫丹雘輝煌殿中聖像端嚴
衣冠灼灼神彩若生謁容展拜自不敢慢且易也襄邑
文曜弗暉久矣我公掄才教育復建文昌祠以補黌宮
廢缺席幾神以人安文以神昌蹇厄士運不將轉而爲
庠徵嘉會也耶工始於萬歷六年三月某日落成於本
年八月某日宜勒貞珉以記歲月云

請益亭記

田子堅

縣尹

襄垣居民淳樸勤儉好禮來牧者多幸其易治余前以
侍御黜官秦判再轉而牧茲邑履任初有名公碩俊抱
負經猷者接踵而來教余以言余延之上賓天下郡邑
皆設有賓館吾襄舊無是館特借於東署狹陋弗展敬
褻孰甚焉余罔敢仍其褻也遂捐俸備材創於大門內
東隅亭越三月而成凡我嘉賓咸會落之余拜客而請
名其亭客曰亭非徒爲延賓爾也以請益爲名斯善矣
余曰斯名何所取爾也客曰宰一邑難乎易乎有任之
者莫不曰地不過百里民不過萬數吾撫而驅之無難
色焉獨不思以百里萬人之命懸於一人之身而爲之

主中間變曲萬狀情欲多端吾必周思詳處各體其意而撫摩之又起其蔽而振刷之使咸遂赤子之願而絕無悲隅者恐吾之才力不能必周其用也是豈易焉已乎夫天下之大一邑之積也天下之治邑治之積也一邑之士之民凡夫利害豈能盡悉者乎機宜豈能盡識者乎人情土俗豈能盡隨處而體協者乎比之天下殆不可以煩簡勞逸而異視也一邑雖小而其樞要甚大若此則力易強而有功心難強而有智也其投之必欲合董之必欲理調停而振育之必如其願雖吾才亦不能以自用者不可不謂之難也知其難則必不自有

其才不易其任則必廣乎其智凡夫計議可以補吾之
牧治者皆虛受而求有益也虛以受益而來教之賓廣
亭成而盡延之可以集衆思而萃廟謨邑治弗患其難
也已茲則命名義也余頓首曰命之矣客退遂述求益
之說刻石爲記

潞城縣重修廟學記

張應兆 教諭

潞城廟學張公壁重修於洪武己酉張公璟再造於成
化庚子迄今頌二公之功不衰第歲久凋敝不治間有
改爲反使巷路壅塞工堪輿者惜焉萬歷丙戌夏關中
馮侯來宰是邑甫下車卽以興賢育才爲首務及謁先

師登講堂顧瞻庭宇惻然嘆曰廟以祀聖賢學以造士
類廢弛若此何以萃風氣而振人文乎時欲經理苦歲
惡未果越二稔政行化洽乃白於諸臺捐俸金出積穀
鳩工聚材大爲修葺於是縣丞孫學主簿魏續訓導王
三畏劉琮典史張杰協心贊畫仍選醫士官宋朝薦王
子民朝夕董督先移鐘鼓各適方位次闢門巷疏通氣
脉遂建牌坊以肇文明葺戟門以壯偉觀繕兩廡以安
先賢修明倫以授生徒其他若泮池若齋舍若鄉賢名
宦厨庫牆垣次第修舉俾百餘年之傾圯一旦煥然回
視二張公之功大有光矣工告成闔學士子欣欣頌侯

功德琢石徵余言以爲之記侯諱惟賢字子官別號薦
吾陝西咸寧人舉癸酉鄉試

潞城縣修城記

馮惟賢

上黨古稱重鎮潞城其屬邑去雲中不遠千里通衛趙
不啻三舍乃冀并之腹背澤潞之襟喉也城視他邑尤
急明興二百餘年教化恩威翔洽方外鎖鑰懸而不用
邇來封守之備漸以廢弛殘堞頽垣大非設險守國之
意矧魯情叵測變生意外是不可不預爲之防也予領
牧是邑卽欲補葺柰路乃寢剝積衰之地加以荒歉頻
仍縱興不得已之役而財力安從辦耶用是日夜兢惕